

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona" br. 7/97 i 3/99) i ("Službene novine Tuzlanskog kantona" 13/99, 10/00 i 14/02), na prijedlog Vlade Tuzlanskog kantona, Skupština Tuzlanskog kantona na sjednici održanoj dana 26.02.2004. godine, d o n o s i

## **ZAKON O OBRTU**

### **I – OPĆE ODREDBE**

#### **Član 1.**

Ovim zakonom u skladu sa federalnim Zakonom o obrtu ("Službene novine Federacije BiH", broj:52/02 i 29/03) uređuju se uvjeti za obavljanje obrta, registracija, poslovanje, zajedničko obavljanje i prestanak obavljanja obrta, obrazovanje i osposobljavanje za obavljanje obrta, organizovanje obrtnika i nadzor.

#### **Član 2.**

Obrt je samostalno i trajno obavljanje dopuštenih i registrovanih privrednih i drugih djelatnosti u osnovnom i dopunskom zanimanju, na način propisan zakonom .

Obrtnik je fizičko lice koje obavlja djelatnost u svoje ime i za svoj račun, a pri tome se može koristiti radom drugih lica.

### **II – OBAVLJANJE OBRTA**

#### **Član 3.**

Fizičko lice može obavljati obrt kao osnovno zanimanje i dopunsko zanimanje ako ispunjava opće i posebne uvjete propisane zakonom .

#### **Član 4.**

Kada je za obavljanje obrta potreban poslovni prostor obrtnik može obavljati obrt samo u poslovnom prostoru koji mora udovoljavati zakonskim i drugim propisima za obavljanje određene privredne djelatnosti.

#### **Član 5.**

Obrtnik može obavljati obrt u stambenim prostorijama pod uvjetima i za djelatnosti koje će propisati kantonalni ministar nadležan za obrtništvo, zavisno o vrsti obrta .

Obrtnik može obavljati obrt izvan poslovnih i stambenih prostorija pod uvjetima i za djelatnosti koje će propisati kantonalni ministar nadležan za obrtništvo, zavisno o vrsti obrta.

Obrtnik može sezonski obavljati obrt pod uvjetima i za djelatnosti koje će propisati kantonalni ministar nadležan za obrtništvo, zavisno o vrsti obrta .

### **1. Otvaranje obrta**

#### **Član 6.**

Za obavljanje obrta obrtnik mora imati obrtnicu.

Obrtnicu rješenjem izdaje općinska služba za upravu nadležna za obrtništvo (u daljem tekstu: općinska služba) u skladu sa Zakonom o upravnom postupku, u roku od 15 dana.

Općinska služba dužna je sva rješenja u vezi sa obavljanjem obrta dostaviti obrtniku, poreznoj upravi, nadležnim inspekcijama, službama Zavoda penzijskog i invalidskog osiguranja, zdravstvenog osiguranja, Federalnog zavoda za statistiku i Obrtničkoj komori Tuzlanskog kantona (u daljem tekstu: Obrtnička komora), u roku od 8 dana od dana njihovog donošenja.

Protiv rješenja općinske službe obrtnik ima pravo žalbe kantonalom ministarstvu nadležnom za obrt.

#### **Član 7.**

Obrt se upisuje u obrtni registar koji vodi općinska služba .

#### **Član 8.**

Obrtnik je dužan otpočeti sa obavljanjem obrta najkasnije u roku od 6 mjeseci od dana izdavanja obrtnice .

#### **Član 9.**

Firma je ime pod kojim obrt posluje.

Promjenu naziva i oznake obrta obrtnik je dužan prijaviti općinskoj službi koja o tome donosi rješenje.

#### **Član 10.**

Sjedište obrta je mjesto naznačeno u obrtnici .

Promjenu sjedišta obrta na području iste općine obrtnik prijavljuje općinskoj službi.

Ako obrtnik mijenja sjedište obrta i prenosi na područje druge općine dužan je da priloži rješenje o odjavi obrta općinske službe u ranijem sjedištu obrta.

Ako obrtnik mijenja sjedište obrta sa drugog kantona i isto prijavljuje na području općine Tuzlanskog kantona (u daljem tekstu: Kanton) dužan je podnijeti prijavu i priložiti obrtnicu općinskoj službi nadležne općine Kantona.

Općinska služba koja je donijela rješenje o promjeni sjedišta obrta dužna je po pravosnažnosti rješenja obavijestiti općinsku službu koja je izdala obrtnicu i nadležne organe iz člana 6. stav 3. ovog zakona .

## **2. Poslovanje obrta**

#### **Član 11.**

Obrtnik može obavljati samo one obrte koji su obuhvaćeni obrtnicom, a u slučaju posebnih obrta samo one za koje je dobio saglasnost za obavljanje posebnih obrta.

Osim obrta iz stava 1. ovog člana koji je obuhvaćen obrtnicom obrtnik može da obavlja i druge djelatnosti koje služe obavljanju djelatnosti koje su obuhvaćene obrtnicom ili se uobičajeno obavljaju uz djelatnost obuhvaćenu obrtnicom, ako se obavljaju u manjem obimu.

Djelatnosti iz stava 2. ovog člana, obrtnik je dužan prijaviti općinskoj službi koja je izdala obrtnicu radi upisa u obrtni registar .

#### **Član 12.**

Obrtnik može obavljati obrt u više izdvojenih prostora koji se nalaze izvan sjedišta obrta i koji moraju zadovoljavati uvjete propisane zakonom.

#### **Član 13.**

Općinska služba izdat će rješenje o obavljanju obrta, odnosno o prestanku obavljanja obrta u izdvojenom prostoru koje će po pravosnažnosti upisati u evidenciju izdvojenih poslovnih prostora i izvršiti upis u obrtni registar .

Ukoliko se radi o obavljanju posebnog obrta, služba iz stava 1. ovog člana primjerak rješenja dostavit će federalnom ministarstvu koje je izdalo saglasnost za obavljanje posebnog obrta .

#### **Član 14.**

Nakon smrti obrtnika obrtnica za slobodne i vezane obrte se može prenijeti na njegove nasljednike na način propisan zakonom.

#### **Član 15.**

Nakon smrti obrtnika nasljednici mogu nastaviti voditi obrt do prijenosa obrtnice u smislu člana 14. ovog zakona, putem privremenog poslovodje koji mora ispunjavati uvjete iz ovog zakona .

Zahtjev za odobrenje za nastavak vođenja obrta putem privremenog poslovodje podnosi se općinskoj službi u roku od 30 dana od dana smrti obrtnika .

Privremeni poslovodja se upisuje u obrtni registar .

#### **Član 16.**

Ako nasljednici žele prenijeti obrtnicu za slobodne i vezane obrte na sebe nakon smrti obrtnika, te nastaviti obrt putem poslovodje, dužni su to prijaviti općinskoj službi u roku od 30 dana od dana okončanja ostavinskog postupka.

Općinska služba donosi rješenje, te upisuje prijenos obrtnice i nastavak vođenja obrta putem poslovodje u obrtni registar .

#### **Član 17.**

Ako u slučaju djelimičnog ili potpunog gubitka poslovne sposobnosti obrtnika, njegova supruga i djeca i druga lica u skladu sa zakonom žele prenijetu obrtnicu za slobodne i vezane obrte na sebe, te nastaviti voditi obrt putem poslovodje, dužni su to prijaviti općinskoj službi u roku od 30 dana od dana pravosnažnosti sudske odluke o oduzimanju poslovne sposobnosti.

Općinska služba donosi rješenje te upisuje prijenos obrtnice i nastavak vođenja obrta putem poslovodje u obrtni registar .

#### **Član 18.**

Raspored minimalnog dnevnog i sedmičnog radnog vremena obrtnika , kao i minimalno radno vrijeme obrtnika u dane državnih praznika i neradnih dana za pojedine obrte utvrđuje se propisom općine .

Općinska služba za pojedine obrte može propisati raspored početka i završetka dnevnog i sedmičnog radnog vremena.

### **4. Zajedničko obavljanje obrta**

#### **Član 19.**

Dvoje ili više fizičkih lica mogu zajednički obavljati obrt .

Medjusobni odnosi i odgovornosti lica iz stava 1.ovog člana uređuju se pisanim ugovorom koje ugovorne strane dostavljaju općinskoj službi prilikom upisa u obrtni registar .

### **5. Prestanak obrta**

#### **Član 20.**

Obrt prestaje odjavom ili po sili zakona.

Obrtnik je dužan odjaviti obavljanje obrta pismenim putem općinskoj službi prije prestanka rada.

Prestanak obrta utvrđuje rješenjem općinska služba i po pravosnažnosti rješenja briše se obrt iz obrtnog registra.

#### **Član 21.**

Obrtnik može privremeno obustaviti obavljanje obrta u trajanju do jedne godine, o čemu pismenim putem izvještava općinsku službu u roku od 30 dana od dana obustave.

Iznimno, obrtnik može privremeno obustaviti obavljanje obrta u trajanju do tri godine kada koristi porodiljski dopust do navršene treće godine života djeteta.

O ponovnom početku obavljanja obrta obrtnik je dužan pismenim putem izvijestiti općinsku službu najkasnije u roku od 7 dana po isteku vremena privremene obustave obrta.

Općinska služba rješenje o privremenoj obustavi odnosno o ponovnom početku obavljanja djelatnosti dostavlja nadležnim organima iz člana 6. stav 3. ovog zakona u roku od 8 dana od dana njihovog donošenja.

### **III – OBRAZOVANJE I OSPOSBLJAVANJE ZA OBAVLJANJE OBRTA**

#### **Član 22.**

Obrazovanje za obavljanje vezanih obrta za koje se traži odgovarajuća školska sprema vrši se u odgovarajućim srednjim, višim i visokim školskim ustanovama.

#### **Član 23.**

Za obavljanje vezanih obrta za koje se traži stručna osposobljenost polaže se ispit o stručnoj osposobljenosti prema programu koji donosi kantonalni ministar za obrazovanje, nauku, kulturu i sport na prijedlog Obrtničke komore.

Ispit o stručnoj osposobljenosti polaže se pred komisijom koju osniva Obrtnička komora, a sastoji se od najmanje 3 člana.

Ispit o stručnoj osposobljenosti obuhvata praktična strukovna znanja i znanja neophodna za samostalno obavljanje obrta .

Obrtnička komora vodi evidenciju o završenom stručnom osposobljavanju i o tome obavještava Obrtničku komoru Federacije BiH.

O završenom stručnom osposobljavanju izdaje se uvjerenje.

#### **Član 24.**

Troškovi polaganja ispita o stručnoj osposobljenosti snosi polaznik.

Kantonalni ministar nadležan za obrtništvo, na prijedlog Obrtničke komore , rješenjem utvrđuje cijenu polaganja ispita o stručnoj osposobljenosti.

Nadzor nad zakonitošću organizovanja i provodjenja ispita o stručnoj osposobljenosti sprovođit će kantonalno ministarstvo nadležno za obrtništvo.

#### **Član 25.**

Pravilnik o polaganju ispita o stručnoj osposobljenosti donosi Obrtnička komora uz saglasnost kantonalnog ministra nadležnog za obrtništvo.

### **IV – ORGANIZOVANJE OBRTNIKA**

#### **Član 26.**

Radi unapređivanja, uskladjivanja i zastupanja zajedničkih interesa obrtnici osnivaju udruženja na teritorijalnom i strukovnom principu, na području jedne ili više općina Kantona .

#### **Član 27.**

Udruženja obrtnika mogu se učlaniti u Obrtničku komoru.

Obrtnici na području Kantona danom upisa u registar obrtnika mogu postati članovi Obrtničke komore i u tom slučaju obavezni su plaćati članarinu utvrđenu Statutom Komore.

#### **Član 28.**

Naziv i sjedište Obrtničke komore određuje se Statutom prema sjedištu ili nazivu Kantona .

Statut Obrtničke komore se objavljuje u "Službenim novinama Kantona.

#### **Član 29.**

Članovi udruženja obrtnika i Obrtničke komore su obrtnici koji obavljaju obrt na području Kantona, u skladu sa ovim zakonom.

#### **Član 30.**

Organizacija, upravljanje, nadležnost i djelatnosti Obrtničke komore utvrđuje se Statutom koji donosi Skupština Obrtničke komore (u daljem tekstu: Skupština Komore).

Saglasnost na Statut Obrtničke komore daje Vlada Kantona.

#### **Član 31.**

Obrtničkom komorom upravljaju članovi putem organa Komore.

Statutom Obrtničke komore utvrđuju se organi, sastav organa, način izbora, trajanje mandata i druga pitanja u vezi sa njihovim radom vodeći računa o strukovnoj, teritorijalnoj i nacionalnoj zastupljenosti.

Odluku o raspisivanju izbora za organe Komore donosi Skupština Komore .

#### **Član 32.**

U okviru Obrtničke komore djeluje Sud časti.

Sud časti vodi postupak i odlučuje o povredama poslovnih običaja, ugovora, tržišnih pravila i drugih propisa.

Statutom i drugim općim aktima Obrtničke komore utvrđuje se organizacija, sastav, način izbora, mjere koje može izreći, postupak i druga pitanja rada Suda časti .

#### **Član 33.**

Odluku o načinu izbora članova i zakazivanje osnivačke Skupštine Komore donijet će Vlada Kantona na prijedlog obrtnika i udruženja obrtnika sa teritorije Kantona u roku od 60 dana od dana stupanja na snagu ovog zakona .

### **V –NADZOR**

#### **Član 34.**

Upravni nadzor nad sprovođenjem ovog zakona i propisa donesenih na osnovu ovog zakona vrši nadležno kantonalno ministarstvo za obrtništvo u skladu sa zakonom.

Inspeksijske poslove u provedbi ovog zakona i propisa donesenih na osnovu ovog zakona vrše nadležne inspekcije.

### **VI – KAZNENE ODREDBE**

#### **Član 35.**

Novčanom kaznom od 300,00 do 2.500,00 KM kaznit će se za prekršaj obrtnik :

- ako obavlja obrt u stambenom prostoru i izvan poslovnog i stambenog prostora suprotno članu 5. ovog zakona,
- ne prijavi obavljanje obrta i druge djelatnosti koja nije obuhvaćena obrtnicom (član 11. stav 3.)

Za prekršaj iz prethodnog stava naplatit će se novčana kazna od obrtnika na licu mjesta od strane nadležnog inspektora u iznosu od 200,00 KM, a za prekršaj iz alineje 2. ovog člana i od privremenog poslovođe u iznosu od 30,00 KM.

#### **Član 36.**

Novčanom kaznom od 300,00 do 1.500,00 KM kaznit će se za prekršaj rukovodilac organa uprave odnosno odgovorno lice na koga su prenesena javna ovlaštenja:

- ako rješenje u vezi sa obavljanjem obrta ne dostavi nadležnim organima u roku u propisanom roku (član 6. stav 3.),
- ako rješenje o privremenoj obustavi odnosno ponovnom početku obavljanja obrta ne dostavi nadležnim organima u propisanom roku (član 21. stav 4.)

Za prekršaj iz prethodnog stava naplatit će se novčana kazna od odgovornog lica na koga su prenesena javna ovlaštenja na licu mjesta od strane nadležnog inspektora u iznosu od 100,00 KM.

## VII – PRIJELAZNE I ZAVRŠNE ODREDBE

### Član 37.

Kantonalni ministar nadležan za obrtništvo i ministar za obrazovanje, nauku, kulturu i sport, kao i Obrtnička komora donijet će propise na osnovu ovlaštenja iz ovog zakona u roku od 60 dana od dana stupanja na snagu ovog zakona.

### Član 38.

Ovaj zakon stupa na snagu osmog dana od dana objavljivanja u "Službenim novinama Tuzlanskog kantona".

**Bosna i Hercegovina**  
**Federacija Bosne i Hercegovine**  
**TUZLANSKI KANTON**  
**Skupština**

Broj: 01-01-02-640-14/2003  
Tuzla, 26.02.2004

**Predsjednik**  
**Skupštine Tuzlanskog kantona**

**Amir Fazlić, s.r.**

**(Objavljen u "Službenim novinama Tuzlanskog kantona" br. 4/04)**